

通志略

冊六

禮略第三通志卷第四十四

嘉禮

天子加元服

周制文王年十二而冠

文王十三生伯邑考左傳曰冠而生子禮也

成王十五而冠

譙周五經

然否論云古文尚書武王崩成王年十三推武王庚辰歲崩周公以壬午歲出居東癸未歲反禮公冠記周公冠成王命史作祝辭告是除喪冠也周公未反成王冠弁開金縢之書時十六矣是成王十五周公冠之而後出也按禮傳天子之年近則十二遠則十五必冠矣

將冠筮日筮賓行之於廟冠委貌於阼三加彌尊

冠義曰冠於阼以著代也或曰三加

彌尊上禮也大戴禮公冠篇曰公冠四加後加玄冕天子亦有四加後加衮冕

裸享樂于廟

左傳曰晉侯問魯大夫季武子

襄公年曰君可冠矣武子對曰君冠必以裸享之禮行之以金石之樂節之以先君之祧處之

周公冠成王命史雍

頌曰近於民遠於耳遠於佞近於義嗇於時惠於財祿賢使能漢改

皇帝冠爲加元服惠帝加元服用正月甲子若丙子爲吉後漢遵前

制皆以正月甲子若丙子爲吉日可加元服儀從冠禮乘輿初加緇

布進賢次爵弁次武弁次通天冠冠訖皆於高祖廟如禮謁見和帝

冠以正月甲子乘金根車駕六玄蚪至廟成禮乃迴軫反宮朝服以

饗宴撞太簇之鐘咸獻壽焉順帝以初月丙子加元服於高廟獻帝

興平元年正月甲子加元服司徒淳于嘉爲賓加賜元纁駟馬賜貴

人公主卿司隸校尉城門五校及侍中尚書給事黃門侍郎各一人

爲太子舍人魏氏天子冠一加

其說曰古之士禮服必三加彌尊所以喻其志至於天子諸侯無加數之

文者將以踐阼臨人尊極德成不復與士以加喻勉爲義禮冠於廟自魏不復在廟矣

東晉諸帝冠儀一加幘

冕將冠金石宿設百僚陪位又先於殿上鋪大牀御府令奉冕幘簪

導衮服以授侍中常侍太尉加幘太保加冕太尉讀祝文曰令月吉

日始加元服皇帝穆穆思弘衮職欽若昊天六合是式率遵祖考永

永無極眉壽惟祺介茲景服加冕訖侍中繫元紃脫帝絳紗服加衮

服冠事畢太祝率羣臣奉觴上壽王公以下三稱萬歲乃退成帝用

三元吉日既加元服拜于太廟穆帝孝武將冠皆先以幣告廟訖事

又廟見臺符問脩服未畢吉凶不相干爲可加元服與不太常王彪

之議禮雖有喪冠當是應冠之年服制未終若須服終便失應冠之年故也今便准喪冠闕饗樂而行事不須脩服畢按晉故事及兩漢亦不必三元當任時事之宜耳後魏正光元年秋孝明帝年十一加元服訖拜太廟大赦改元北齊制皇帝加元服以玉帛告圜丘方澤以幣告廟擇日臨軒皇帝著空頂介幘以出太尉盥訖升脫空頂幘以黑介幘奉加訖太尉進太保之右北面讀祝訖太保加冕侍中繫元統脫絳紗袍加袞服事畢太保上壽羣官三稱萬歲皇帝入溫室移御座而不上壽後日文武羣官朝服上禮酒十二鐘米十二囊牛十二頭又擇日親拜圜丘方澤謁廟唐制具開元儀

皇太子冠皇子皇孫附

周制天子元子猶士也天下無生而貴者也

家語冠頌曰天子之元子之冠擬諸侯之冠四

加漢宣帝冠太子以正月冠諸王遣使行事魏氏冠太子再加皇子

王公嗣子乃三

孫毓以爲一加再

加皆非禮也冠諸王因漢遣使行事晉惠帝之爲

太子將冠武帝臨軒使兼司徒高陽王珪加冠兼光祿大夫屯騎校尉華廙贊冠泰始六年南宮王承年十五依舊應冠有司奏議禮十五成童國君十五而生子以明可冠之儀又漢魏遣使冠諸王非古典於是制儀王十五而冠遂革使命咸寧二年閏九月遣使冠汝南王東惠帝以正月丙午冠太子訖乃廟見懷帝亦以正月冠皇太子宋冠皇太子及藩王以一加齊武帝孫南郡王昭業冠從尚書令王儉議使太常持節一加冠大鴻臚爲贊醺酒之儀國官陪位拜賀如常其日內外二品清官以上詣公車門集賀并詣東宮南門通牋別日上禮宮臣亦詣門稱慶如上臺之儀既冠之後尅日謁廟祝辭曰皇帝使給事中太常武安侯蕭惠本加南郡王冠筮日戒賓肇加元服棄爾幼志從厥成德親賢使能克崇景福醺酒辭曰旨酒既清嘉薦既盈兄弟具在淑慎儀刑永永眉壽於穆斯寧明帝冠太子用正月梁武帝天監十三年正月冠太子於太極殿修前代之儀後魏孝

文帝冠皇太子恂於廟詔曰司馬彪漢志漢帝有四加冠一緇布二進賢三武弁四通天朕見家語冠頌篇四加冠公也家語夫子之言與正經何異諸儒惑司馬彪志致使天子之子而行士冠朕以爲有賓諸儒皆以爲無賓孔氏所云斐然成章其斯之謂矣北齊制皇太子冠則太尉以制幣告七廟擇日臨軒有司供帳於崇正殿中嚴皇太子空頂幘公服出立東階之南西面使者入立西階之南東面太子受詔訖入室盥櫛出南面使者進揖詣冠席西面坐光祿卿盥訖詣太子前跪櫛使者又盥奉進賢三梁冠至太子前東面祝脫空頂幘加冠太子興入室更衣出又南就冠席光祿卿盥櫛使者又盥祝脫三梁冠再加遠遊冠太子入室更衣設席中楹之西使者揖就席南面光祿卿洗爵酌醴使者詣席前北面祝太子拜受醴卽席坐祭之啐之奠爵降階復位西面三師三少及在位羣官拜事訖又擇日會宮臣又擇日謁廟隋制皇太子將冠前一日帝齋於大興殿太子

與賓贊及預從官齋於正寢其日質明有司告廟各設筵於阼帝袞冕卽御座賓揖太子進升筵西向坐贊冠者坐櫛設纚賓盥訖初加緇布冠贊進設頰邱癸切纓賓揖太子適東序衣元衣素裳以出贊者

又坐櫛賓進加遠遊冠改服訖賓又授冕太子適東序改服以出賓揖太子南面立賓受醴進筵前北面立祝之切又太子拜受觶賓復位

東面答拜贊者奉饌於筵前太子祭奠禮畢降筵進當御東面拜納言承詔詣太子戒訖太子拜贊者引太子降自西階賓少進字之贊者引太子進立於庭東面諸親拜訖贊者拜太子皆答拜與賓贊俱復位納言承詔降命令有司致禮賓贊又拜帝復降阼階下拜太子以下皆拜帝出更衣還宮太子從至闕因入見皇后而還唐貞觀五年正月有司上言皇太子將冠禮宜用二月爲吉請追兵以備儀注太宗曰今東作方興恐妨農事令改用十月太子少保蕭瑀奏稱准陰陽家用二月爲勝上曰陰陽拘忌朕所不行若動靜必依陰陽不

顧禮義欲求福祐其可得乎若所行皆遵正道自然當與吉會且吉凶在人豈假陰陽拘忌農時甚要不可暫失開元六年侍中宋璟上表曰臣伏以太常狀准東宮典記有上禮之儀謹按上禮非古從南齊後魏方始有此事而垂拱神龍更扇其道羣臣斂錢獻食君上厚賜答之姑息施恩方便求利皇太子冠乃盛禮自然合有賜賚上臺東宮兩處宴會非不優厚其上禮宜停其儀具開元禮

諸侯大夫士冠

夏小正記二月冠子之時也周制繼世以立諸侯象賢也冠禮筮曰筮賓冠於阼醮於客位三加彌尊已冠而字之見於母母拜之見於兄弟兄弟拜之

成人而與爲禮

晉王堪冠禮儀云永平元年

惠帝時

正月戊子

冠中外四孫立于步廣里舍之阼階設一席于東廂引冠者以長幼次于席南東上賓宗人立于西廂東面南上堪立于東軒西南面西上陳元服于席上宗人執儀以次呼冠者各應曰諾宗人申誠之曰

以歲之正以月之令兄弟具來咸加爾服棄爾幼志順爾成德克慎威儀惟民之則壽考惟祺永受景福冠者高跪而冠各自著布興再拜從立于賓南上酌四杯酒各拜醺而飲事訖上堂向御史府君再拜訖冠者皆東面坐如常燕禮時賓宗人東平王隆叔祚王循道安王業建始此皆古禮也但以意斟酌從其簡者耳唐制具開元禮

天子納妃后冊后附

伏羲氏制嫁娶以儷皮爲禮夏氏親迎於庭殷迎於堂周制限男女之歲定婚姻之時媒氏云令男三十而娶女二十而嫁婚姻之時卽仲春之月親迎於戶六禮之

儀始備

一曰納采二曰問名三曰納吉四曰納徵五曰請期六曰親迎惟納徵用束帛他皆用鴈

天子聘女納徵

加穀珪漢惠帝納后納采鴈璧乘馬束帛聘黃金二百斤馬十二匹

呂氏爲惠帝娶魯元公主女故特優其禮

平帝立王莽納女爲后以固權及莽所聘杜陵

氏女皆侈大其事不足爲法後漢桓帝立明年有司奏太后曰春秋迎皇后于紀在塗則稱后今大將軍冀女弟應紹聖善結婚之際有

命既集宜備禮幣於是悉依孝惠皇帝納后故事聘黃金二百斤納
采鴈璧乘馬束帛一如舊典靈帝冊宋貴人爲皇后天子御章德殿
軒百官陪位太尉襲使持節奉璽紱皇后北面帝南面太尉立階下
東向宗正大長秋西向宗正讀冊畢皇后拜稱臣妾就位太尉授璽
紱中常侍長樂太僕高鄉侯覽長跪受璽紱奏於殿前女史以次受
之至于昭儀受而長跪以帶皇后皇后伏起拜稱臣妾畢黃門鼓吹
三通鳴鼓畢羣臣以次出后即位大赦天下魏制天子冊后以皮馬
庭實加穀珪齊王正始四年立后甄氏其儀不存晉武帝咸寧二年
臨軒遣太尉賈充策立皇后楊氏因大赦賜王公已下各有差百僚
上禮納悼太康八年有司奏大婚納徵用元纁束帛加穀珪馬二駟

羊鴈酒米如故

尚書朱整議按魏婚故事天子以皮馬爲庭實加以穀珪

東晉成帝咸康二年臨

軒遣使持節兼太保領軍諸葛恢兼太尉護軍孔愉六禮備物拜皇
后杜氏即日入宮帝御太極殿羣臣畢賀康帝建元元年納后褚氏

而儀注陞者不設旄頭殿中御史奏令迎皇后依昔成恭皇后入宮御物而儀注至尊袞冕升殿旄頭不設又按昔迎成恭皇后唯作青龍旂其餘皆卽御物今當臨軒遣使而五牛旂旄旄頭畢罕並出卽用舊置今闕詔曰今所以正法服升太極者以謹其始故備禮也今云何闕所重而撤法物邪又恭后神主入廟先帝詔后禮宜有降不宜建五牛旗旣不設五旗則旄頭畢罕之物易具也又詔舊制旣難準且於今而備法服儀飾粗舉其兼副雜器停之穆帝永和十年臺符問六禮版文舊稱皇帝今太后臨朝當何稱博士曹耽云公羊傳婚禮不稱主人母命諸父爲主太常王彪之云三傳異義不可全據今皇后臨朝稱制文告所達國之大典皆仰稟成命非無外事也豈婚聘獨不通乎六禮版文應稱皇太后詔符又問今太后還政不復臨朝當何稱彪之云當稱皇帝詔升平元年將納皇后何氏彪之正禮曰王者之於四海無不臣妾雖復父兄之親師友之賢皆純臣也

夫崇三綱之始定乾坤之儀安有天父之尊而稱臣下之命以納伉儷安有臣下之卑而稱天父之名以行大禮遠尋古禮於義不通按咸寧二年納悼皇后時弘訓太后臨天下而無命戚屬之臣爲武皇父兄主婚之文考咸寧故事不稱父兄師友則當時華恆所上合於舊也謂今納后儀制一依咸寧故事從之

華恆定六禮宜依舊唯娶婦之家三日不舉樂而咸

康羣臣賀爲失禮故但依咸寧上禮不復賀

其告廟六禮版文等皆彪之所定

博士荀納云凡六禮

版長尺二寸以應十二月博四寸以象四時厚八分以象八節皆真書后家答鮫腳書之

納采問名納吉請期親

迎皆用鴈白羊各一酒米各十二斛唯納徵用白羊一元纁帛三疋

絳二疋絹二百疋獸皮二枚錢二百萬玉璧一枚酒米各十二斛馬

六匹鄭康成所謂五鴈六禮也六禮之文皆稱皇帝咨后家稱糞土

臣某頓首稽首再拜以答其策皇后之文曰惟升平元年八月皇帝

使使持節兼太保侍中太宰武陵王晞冊命故散騎侍郎女何氏爲

皇后咨爾易本乾坤詩首關睢王化之本實由內輔是故皇英嬪虞

帝道以光妊姒母周胤嗣克崇皇后其祗勗厥德以肅承宗廟虔恭
中饋盡其婦道帥導六宮作軌儀于四海皇天無親惟德是依可不
慎歟北齊皇帝納后之禮納采問名納徵訖告園丘方澤及廟是日
皇帝臨軒命太尉爲使司徒副之持節詣后行宮東向奉璽綬冊以
授中常侍皇后受冊於行殿使者與公卿以下皆拜有司備迎禮太
尉太保受詔而行主人公服迎拜於門使者入升自賓階東面主人
升自阼階西面禮物陳於庭設席於兩楹間童子以璽書版升主人
跪受送使者拜于大門外有司先於昭陽殿兩楹間供帳爲同牢之
具皇后服大嚴繡衣帶綬珮加幃音景女長御引出升畫輪四望車女
侍中負璽陪乘鹵簿如大駕皇帝服袞冕出升御座皇后入門大鹵
簿住門外小鹵簿入到東上閣施步障降車席道以入昭陽殿前至
席位姆去幃皇后先拜後起皇帝後拜先起升自西階詣同牢座與
皇后俱坐各三飲訖又各酹二爵一盃奏禮畢后興南向立皇帝御

太極殿王公以下拜表謝又明日以榛栗棗脩見皇太后於昭陽殿
擇日羣臣上禮又擇日謁廟皇帝使太尉先以太牢告而後遍見羣
廟唐皇帝納后卜日告天地臨軒命太尉爲使宗正卿爲副並如開
元禮

天子冊妃嬪夫人

周制天子后立六宮三夫人九嬪二十七世婦八十一御女以聽天
下之內治後漢獻帝建安十八年曹操進三女憲節華爲夫人聘以
束帛元纁五萬疋小者待年於國二十年並拜貴人晉武帝泰始十
年將聘三夫人九嬪有司奏禮皇后聘以穀珪無妾媵禮贄之制詔
曰拜授可依魏氏故事於是臨軒使使持節兼太常拜三夫人兼御
史中丞拜九嬪

皇太子納妃

皇子諸王婚公主嫁附

漢制皇太子納妃奉常迎

時叔孫通定禮以天子無親迎之義皇太子以奉常迎也

晉太康中有

司奏太子婚納徵用元纁束帛加璧羊馬二駟東晉太子婚納徵禮
用玉璧一獸皮二漢魏之禮公主居第尚公主者來第成婚司空王
朗以爲不可其後乃革魏公主嫁用絹百九十疋晉故事用絹三百
疋太元中公主納徵以獸豹皮一宋文帝元嘉十五年四月皇太子
納妃六禮文與納后不異百官上禮其月壬戌於太極殿西堂敘宴
二宮隊主副司徒侍郎以上諸二千石在都邑者並在會又詔令小
會可停伎樂時有臨川曹太妃喪明帝太始五年有司奏按晉江左以來太子
婚納徵用璧一獸皮二未詳合用獐豹皮及熊羆皮與不若應用者
爲各用一爲用兩博士裴昭明按周禮納徵元纁束帛儷皮鄭康成曰束帛以致命兩皮晉納妃以虎皮二虎豹雖文禮所不用熊羆吉祥婚典
庭實皮鹿皮庭實不及珪璋之美爲用各異今儲皇聘納宜准經誥兼太常丞孫詵議
以爲聘幣之典損益惟我禮稱束帛儷皮則珪璋數同璧熊羆文豹
各應用二博士虞穌議按儀禮直云元纁束帛儷皮禮記郊特牲云

虎豹皮與玉璧非虛作也虎豹皮居然用兩璋宜仍舊各一參議詵
齎二議不異今加珪璋各一豹熊羆皮各二以齎議爲允詔可齊武
帝永明中以婚禮奢貴勅諸王納妃上御及六宮依禮上棗栗腰脩
加以香澤花粉其餘衣物皆停唯公主降嫁則上遺舅姑北齊皇太
子納妃禮皇帝遣使納采其次問名納吉並如納采禮納徵則使司
徒及尙書令爲使備禮物而行請期則以太常宗正卿爲使如納采
親迎以太尉爲使三日妃朝皇帝於昭陽殿又朝皇后於宣光殿擇
日羣臣上禮他日妃還又他日皇太子拜閣皇太子及王聘禮納采
問名納吉請期親迎皆用羔一鴈一酒黍稷米麩各一斛納徵用元
三疋纁二疋束帛十疋大璋一虎皮二錦綵六十疋絹二百疋羔一
羊四犢二酒黍稷米麩各十斛從車百乘隋皇太子納妃禮皇帝臨
軒使者受詔而行主人候於廟門使者執鴈主人迎拜於大門之東
使者入升自西階立於兩楹間南面納采訖乃行問名儀事畢主人

請致禮於從者禮有幣馬其次擇日納吉又擇日以玉帛乘馬納徵
又擇日告期又擇日命有司以特牲告廟冊妃皇太子將親迎皇帝
臨軒醺而誡曰往迎爾相承我宗事勗帥以敬對曰謹奉詔既命羽
儀而行主人几筵於廟妃服褕翟立於東房主人迎於門外西面拜
皇太子答拜主人揖皇太子先入主人升立於阼階西面皇太子升
進當房戶前北面跪奠鴈俛伏興拜降出妃父少進西面戒之母於
西階上施衿結帨及門內施輦申之出門妃升輅乘以几姆加幃皇
太子乃馭輪三周馭者代之皇太子出大門乘輅羽儀還宮妃三日
雞鳴夙興以朝奠笄於皇帝皇帝撫之又奠笄於皇后皇后撫之席
於戶牖間妃立於席西祭奠而出唐皇太子納妃禮臨軒命使行納
采問名納吉納徵請期告廟臨軒醺戒親迎同牢朝見並如開元禮
開元十九年四月勅於京城置禮會院屬司農寺其什物各令所司
供

院在崇仁坊南街

建中元年十一月禮儀使顏真卿等奏郡縣主見舅姑